

四庫全書

集部

欽定四庫全書

文敏集卷九

明 楊榮 撰

記

進士題名記

洪惟太祖高皇帝受天明命混一海宇誕敷文教以興  
至治建學設科以造就多士三歲一登其賢能而擢用  
之迄今十有餘科賢俊譽髦之士乘時彙進布列中外  
建功立業黼黻治化皇上繼承大統率由舊章尤惓惓

馬以興學育才為務故得人之盛有逾於昔乃永樂十三年當會試之期時皇上駐驛北京天下之士來萃者凡數千人禮部既合試之擇其中選者以進三月朔旦上御奉天殿親降制策咨以古先帝王之治道聖情謙冲玉音渙發在廷大小百執事之臣莫不殫力協心踴躍承事先是春雨方降浹日未霽及廷試之旦玄雲卷舒將雨復止祥飈微來天宇廓清霽景融和於是諸士子皆得雍容發舒各攄所蘊以對揚聖訓上荅宸衷以

自慶夫千載一時之遇而天意於此所以協相文明之  
運有非偶然者既賜陳循以下三百五十一人及第出  
身有差臚傳之日都城人士抃舞稱歎以為北京之盛  
美有以過越前代也既而禮部請循舊制立石題名于  
太學上以命臣榮為記臣惟賢才致治之本也唐虞野  
無遺賢書紀其盛成周濟濟多士詩詠其美漢唐宋科  
目得人史著其實其來也久矣欽惟皇上崇獎儒術作  
興士類而諸士子遭逢聖明乘風雲之會仰日月之光

以得展其所學勒名貞石傳於無窮可謂榮且幸矣雖然後之人將於是觀焉可不慎哉惟其立身行事必光明俊偉上有以裨益國家下有以惠利生民斯可以無忝於科目有傳於來世其又可不思所以自勵哉臣榮承乏詞林祇承上命謹述國家所以求賢圖治崇重科目之意與夫諸士子遭遇之盛者如此且以傳之無窮焉

進士題名記

永樂十六年三月朔上在北京廷試天下貢士擢李騏  
等為進士禮部尚書臣震請立石題名于國子監於是  
上命臣榮記其實臣榮謹受命拜手稽首言曰國家膺  
文明之運撫太平之厯興學育材化成天下取士之制  
雖非一途恒以進士為重士子通經學古以圖進取而  
與名者世率以為榮夫當大比之秋京郡合國子監及  
畿甸之士天下布政司合所隸郡邑之士三試之拔其  
尤者貢于禮部蓋什之一明年春禮部以其所貢士又

合而三試之拔其尤者進之大廷蓋二十之一其選至精也廷試之日天子御正朝賜清問翌旦復御正朝親覽而次第之臚傳之旦文武群臣朝服稱賀宴賜恩數一循常典寵光衣被蓋渥如也與其列者誠可謂榮矣茲又立石題名以垂永久後之人將歷指其名曰某也賢某也才足為國家千萬載之光則榮孰大焉或趣向有異德業無聞則亦不能免於公論矣已之善否人之勸戒胥此焉徵於乎可不敬慎之哉題名者凡二百五

十人第一甲第一名即李騏也騏初名馬上特改今名云

進士題名記

永樂辛丑寔皇上正大統之二十年先是上巡狩北京營建都邑至是告成春正月元日乃御奉天殿受朝萬國來同景命維新而是歲適當會試貢士之期領鄉薦而萃京師者三千人禮部拔其尤者二百二人三月望日上臨軒策試越二日以曾鶴齡為第一劉矩次之裴

綸又次之賜進士及第餘賜進士出身有差揭黃榜于  
長安門外公卿大夫暨士庶人咸謂都邑肇建而人才彙  
進如此夫豈偶然哉莫不懽忻鼓舞以為目覩盛事誠  
曠世之嘉遇也有司復請題名于國子監上命臣榮為  
記臣惟昔周之武王遷都于鎬講學行禮以宣教化以  
作新人才而其子孫傳緒至於永久蓋啓之者有其道也  
方今都邑告成之日聖天子諮詢治道登進賢良以隆  
文明之運迓千萬載之太平斯世斯人亦何幸歟諸君

子遭際明時題名於太學太學賢闢天下公論所自有  
其名宜有其實以副之詩曰古之人無斃譽髦斯士皇  
上之盛德也又曰濟濟多士文王以寧是尚有望於諸  
君子其勉之哉臣榮謹記

御賜圖書記

宣德二年二月戊寅上御文華後殿召臣榮諭之曰古  
者君臣莫不同心同德以成天下之務君有失則為臣  
者匡正之臣有過則為君者訓戒之庶幾更相警飭兩

無猜嫌信所謂明良相逢千載一遇者也卿嘗祇事我  
皇祖太宗文皇帝皇考仁宗昭皇帝二十餘年竭誠效  
忠始終一致及今侍朕左右益加敬慎知無不言言無  
不當深用嘉悅茲特賜卿鍍金銀刻圖書五顆曰方直  
剛正曰忠孝流芳者以表卿之忠實也曰關西後裔建  
安楊榮曰楊氏勉仁者以著卿族系之所自出并表其  
名與字也卿尚體朕至意永永無斁臣榮竊惟人臣之  
義惟忠與誠乃能贊輔國家光膺寵命以享爵祿於悠

久苟阿徇以取容迎合以求悅不顧事體之重輕不念  
民情之休戚縱已之所欲言任已之所欲為則將無所  
不至矣其可乎哉臣榮自揣菲才夙夜祗慎惟恐有負  
委托之重為愧耳至於非分之恩曷敢希冀追惟初仕  
以至于今歷事三聖日得侍近清光屢沐天地大恩眷  
待之隆錫賚之厚非一言可述今復蒙恩賜以範銀圖  
書獎諭之重製作之精誠古今罕有臣榮敢不敬承佩  
服傳之子孫永為家寶哉故敢具述于左方以見皇上

眷待恩禮之隆他日或可以備採錄云

建寧府學記

國朝混一天下大興文教內建國子監外置郡縣學以  
教育天下之英才其制甚備薄海內外翕然嚮風學校  
之盛振古未有也士生斯時得以漸摩詩書仁義之澤  
而周旋揖讓乎絃歌俎豆之間何其幸歟建之學舊在  
郡治西南洪武辛巳夏燬于火永樂癸未冬有司上其  
事詔命擇勝地而新之于時郡守宣城芮麟教授姑蘇

張信銳意斯事遂卜吉於郡東黃華之岡高明廣衍於  
學為宜而帥閫廨舍軍士室廬實據其半於是都指揮  
師祐徐信撤其居室以地來歸乃庀材鳩工合屬邑之  
民以涖事凡藩憲兵衛官僚與夫使命之臣躬臨獎勵  
而建之人士亦皆捐貲樂助以相其成未幾郡守劉敬  
繼至命檢校李新專董其役經始於乙酉春二月訖工  
于丙戌冬十二月其東建大成殿翼以兩廡衛以戟門  
而櫺星神厨庫室前後布列其西建明倫堂堂之左右

則有志道據德依仁游藝四齋齋之兩旁則有生徒止  
舍尊經有閣會饌有堂文昌有祠師儒有室至于泮池  
庠門庖廩靡不完具而門之内外又有金聲玉振之坊  
繚以周垣深邃嚴密黝堊丹碧光彩煥然信乎東南之  
偉觀而他郡莫及也今年春郡守劉公來京師請紀事  
刻石垂示于後嗟夫學校王政之本風俗教化之所關  
自昔帝王之治莫先乎此聖天子即位以來親幸太學  
御筵講經訓飭諸生藹然唐虞三代之風由是教化旁

達賢才輩出郁郁乎聲名文物之盛豈非教養之功有以致之歟吾建為晦庵西山二先生過化之邦其流風餘韻宛然猶存士君子景仰其間而又遭逢聖明之治樂夫學之有成得以優游涵養于茲將見高明特達乘時彙興效用當世以顯其功業流芳於無窮誠有以為邦家之光不徒為斯學之榮而已也

固安隄記

天下之難治者莫踰水而治水之先者尤莫踰京師故

大禹之跡首在冀州豈非以水之利害所繫者大而帝  
畿之內宜慎其防以為宏遠之圖也歟盧溝之河發源  
太原之天池伏流至朔州馬邑從雷山之陽發為渾泉  
而為桑乾河鴈門應州雲中山西諸水皆會焉愈遠益  
大過懷來行兩山間拘束齟齬而不得肆至京城西四  
十里石經山之東地勢平而土脉䟽衝激震蕩遷徙弗  
常後魏都督河北道諸軍事建成侯劉靖及子平鄉侯  
弘築戾陵堰以防之水患以息後人思其功謂之劉師

堰歷世既久水勢漸更下流十五里距廬溝不遠有曰  
狼窩口時復衝決漫流而東浸沒田廬民弗安業聖朝  
建北京視河為襟帶永樂間屢嘗修築輒復頽圯今聖  
天子嗣位命工部侍郎李庸內官監少監姜山義往任  
厥事復命太監阮公安少保工部尚書吳公中總其事  
且勅其務存堅久勿為苟且庶幾暫勞永逸群公效命  
材謀具濟經始于正統元年冬畢工于二年夏凡用工  
匠二萬餘月給糧餉以萬計累石重甃培植加厚崇二

丈三尺廣如之延袤百六十五丈視昔益堅既告成賜  
名固安隄命置守護者二十家建神祠於上有司以時  
修祀禮凡督事者悉賜鈔幣以勞之其視築戾陵堰役  
費加倍而堅實亦過之仰惟聖明至德蟠際穹壤而於  
京畿益圖鞏固以寧濟斯民於千萬年諸公亦能同寅  
協恭用成厥功盖可以可固而利益於世者不小皆所  
當書於是叙其始末俾勒諸石庶後之人有考焉

應天府重建儒學記

國家崇儒重道建學育材懋圖化理爰自京畿至于天下郡邑莫不有學設師儒以訓之豐廩餼以養之嘉惠斯文列聖一心人材之盛風俗之美卓冠前古士生斯世而蒙遇若此何其幸哉南京應天府為天下列郡之首學宮在郡治之東南蓋宋景祐中所建歷元再燬于火大德癸卯總管陳元凱復之我太祖高皇帝定鼎金陵即以是學為太學洪武辛酉始創國子監于鷄鳴山之陽而改是學為應天府學以江寧上元二學之生徒

隸焉永樂戊子復燬于火所存者惟東廡及戟門櫺星門東序三齋而已學官因循迨今二十餘年未有能復之者宣德己酉南京守臣襄成伯李公既視政即有事于學於是閱其舊址乃慨然曰是風化所自出而摧弊不復曷以稱皇上教育之盛心哉遂率府寮部屬各捐已帑僦工輸材而府尹史怡等咸捐俸費用相其役以是年七月初吉經始越五月而明倫堂成明年而大成殿立齋廡門廊次第畢舉凡諸故構之陳朽者皆葺而

新之煥然宏麗有加于前於是僉言立石以紀其事治  
中三山高應以書請予記之予惟李公荷國家付托之  
重仰承德意作新學校倡起斯文固為政之所宜先其  
用意之勤經營之篤紀述以勸後人亦宜也夫自古帝  
王之建學莫不以明人倫為化理之本人倫之大莫先  
乎忠孝學者之學亦莫切于斯二者自家及國以至於  
平天下莫不由是而推之馴致其極天地以之而貞觀  
日月以之而貞明五氣以之而順布萬物以之而化成

者何莫不本乎此苟不務此而徒學於文辭以為進取之具是果何補於化理者哉予固知李公風勵之機而願望於後來者如此故推本而書之俾鑱之石以示夫學者其毋以吾言為迂尚相與勉于成也

重建縉雲縣儒學記

學校之設所以化民成俗而為治天下之本其所繫甚重矣唐虞三代之世治隆俗美莫不由是也我太祖高皇帝龍興之初首詔天下郡縣皆立廟學而於京師建

國子監選擇俊秀甄拔師儒以教之聖謨明訓蓋宏遠  
矣繼以太宗文皇帝仁宗昭皇帝孜孜求治而於學校  
之政尤加意焉今皇上繼體守文茂圖化理欲使治效  
超於唐虞三代之盛為臣子者敷宣德意其可不以學  
校為重乎宣德庚戌縉雲重修縣學成教諭松溪楊銘  
馳書京師請予為記曰邑有舊學在史隱山下國初知  
縣劉澤民因唐人故址而新之歷歲滋久日就傾圯典學  
校者欲改為之而力不逮修補破壞苟且歲月而弊陋

滋甚宣德之初三山陳京來知縣事既至視學舍慨然  
曰茲非為政所當先者乎京在是其敢不勉圖新之然  
以視事之始教令未敷未可以勤民及再暮而民化乃  
謀於寮屬各捐俸貲以倡之而邑人之好事者皆樂從  
掄材伐石蠲吉興工化腐橈以堅良易傾侈以方正禮  
殿儀門講堂齋廡次第修舉丹碧黝堊煥然一新經始  
於庚戌之秋七月落成於是冬之十月計其用工雖不  
久而宏規永圖超前數倍不為之記則無以示後來敢

以為請予與京銘皆閩人而京又為令之有聲者顧其所為實治天下之本繫焉義不可辭乃謂之曰朝廷所以重學校者蓋以明人倫美風化育賢材以興文明之治也有司奉行而修舉焉豈直備文具為觀美也哉亦因是而已矣然而人倫之所以明風化之所由美賢材之所由成非獨居之使然也必司政教者明道德於其身有以倡率之耳京以文學登進士其於聖賢之教究之有素茲為百里之政拳拳以興學為心而典教事者

又得銘焉是不徒以其治民者治民而又能以其教民者教民吾知縉雲之理效必有加乎昔矣是可書也乃為之記

清樂軒記

駙馬都尉沐公乃開國輔運推誠宣力武臣榮祿大夫柱國西平侯贈黔寧王之仲子今太傅黔國公之貴介弟也為國勲戚而能忘乎貴富之勢日接賢士大夫敬一軒以游處列琴書尊俎其中外則環樹佳花美蔭之

屬無埃壒喧囂之雜有夷曠靜嘉之趣從游者因名其  
軒曰清樂或謂樂者人情之至願而公卿大夫士所得  
有不同者何以所處之地異也一介之士處衡茅之陋  
甘蔬食之泊味道德而佩仁義飢寒不以為累而其心  
休休焉以自得者衆人之所難也公卿大夫生以世閥  
寵以珪組而不溺於膏梁綺紈之習驕汰侈靡之歸其  
所為與所得較之一介之士曾不少異者雖君子亦難  
矣故世之有得於彼者終遺於此茲乃于公而具見之

此軒之所以名因以表公之一身有以致衆樂之備而  
茲軒之勝又有以見乎為趣之清也又謂公之盛名足  
以榮于身而德益謙長才足以起於衆而志益崇顧乃  
得雍容自逸以享其樂何哉蓋國朝之制所以優禮于  
貴戚者然耳然公雖被優禮之隆昔在永樂中詔營繕  
太嶽太和山宮觀已嘗命公督其役績用有成既而屢  
受命掌行後軍都督府事施設有序上以公為才下以  
公為惠而時論重焉茲遇聖明在上海宇晏安用是得

遂享乎此所謂後天下之樂而樂者歟客有道名軒之意與茲軒之美於予者予方歆羨而致慕焉公乃屢走書金臺求軒之記意尤懇懇不獲辭也遂次第所聞者如此云

重建孟瀆河閘記

君子之立政有可以益國而利乎民者知無不為爲之有方雖疲民力而民忘其勞耗其財而民不自恤苟或役民於非所當務則謗怨隨之其能留聲當時為利後世

者幾希孔子曰擇可勞而勞之又誰怨孟子曰以佚道使民雖勞不怨其信然矣乎工部侍郎廬陵周君忱奉命巡撫蘇常諸郡常之武進故有孟瀆河閘以通東南漕運及商販之舟且溉傍近田數千頃歲久閘壞公私病焉常守莫君愚圖改作之以役費繁重弗敢專謀於周君議以克合遂發往歲節省稅賦浮費以市財餽工礮石姑蘇洞庭山而舟致之郡民皆懽忻趨事作於舊址之南丈餘其下先錯列巨枋貫以長松而後寘石焉

東西石甃縱以丈計為十有六崇以丈計為二百五中  
廣視縱當八之一南北為鴈翅狀以殺水勢中夾木石  
鑿以納懸板而上下之經始於宣德八年九月而畢工  
於是年之冬用徒匠以日計二萬三千七百六十木以  
株計八千九百石以丈計三千五百灰以斤計二十二  
萬磚以片計十有二萬始終董其役者知縣朱恕效勞  
為多者耆民憚祖聞成而獲利如故莫君以為苟無記  
述則後世莫知所自遂因通判張齡來京請記於余余

按圖誌兩浙運河貫郡城西行三十里歷奔牛呂城二  
埧以達京口舟行既艱而河小不足以通巨艦唐元和  
中刺史孟簡始令開北河自奔牛北行七十里至河莊  
鎮入揚子江舟無巨細皆得徑達于江而免過埧之勞  
第其水上引運河源遠不能常續下仰江潮去來不能  
常存簡於是置閘河莊為之節制使人以時啓閉而其  
利益博其惠之在人可謂深且久矣人以其姓名河謂  
之孟瀆又謂之孟子故閘亦以孟瀆為稱閘廢民失其

利今得周莫二君子協謀而更置之二君子之惠足以  
繼簡而流於無窮是可尚也故系以詩曰

孟瀆伊始唐元和中始之者誰刺史孟公公時為政佚  
道是崇鑿河築閘厥功既隆汎汎者舟往來具通每每  
者田歲恒獲豐歷數百年湮塞嚙衝既阻于舟亦病乎  
農猗歟周君思成其終莫守贊之詢謀僉同相地之宜  
惟善之從乃市良材乃鳩衆工匪取于民匪私于躬錯  
棧累石既堅既礪傍峭而固中虛以容舟無阻艱農無

歲凶人用懼謠二君之功功成惠施既博且洪勒辭于石用昭無窮

浙江嚴州府重修儒學記

學校教化之本王政之先自古有天下國家者莫不致謹於此洪惟我朝天啓文明之運太祖高皇帝定鼎之初首建國學於是四方府州縣皆設庠序以教育天下之英俊以至于今聖聖相承五六十年之間髦士彙進而治道大興猗歟盛哉浙之嚴州郡學舊在城東南隅

宋雍熙二年遷郡城之西北方其時諫議田公文正范公清獻趙公相繼來為郡於是廟學之制教養之具煥然大備然自雍熙至大觀自大觀至紹興百五十年之間凡三改作矣厥後知州事錢可則立石誌之元季兵燹燔蕩靡遺國朝洪武庚戌詔設學校廼即城西舊址以建歲甲寅郡守趙士敏議徙城內今在郡治西南三十步中為大成殿殿之東西為兩廡南有戟門門之外為泮池池之上為石梁東西立二祠池之南為櫺星門

殿之北為明倫堂闢四齋於堂之南左右堂之北為會  
饌堂東廡之東則有神厨神庫等房西廡之西則有射  
圃講肄之所倉廩庖湑靡不整備規模宏敞視舊有加  
焉迺歲廟貌傾圯梁棟朽腐繼遭洪水漂蕩淪浸不堪  
矚目歲丁酉教授孫子敏首捐已俸以倡率之前太守  
李興同知曾所敬通判范耘吳顯推官申文才守禦千  
戶劉福遂安知縣胡子澄暨各庠師儒六邑士人皆出  
財以助之繼而郡太守建安葉公溥下車之初惓惓然

以興學為念復捐貲鳩力協成厥美以是年夏四月經始至冬十二月訖工既成分教郡學謝坤舒宗辰具書其本末因葉公與予同郡來請記予惟正風俗厚人倫敦教化育賢才皆本於學校學校之設誠為政之急務苟非有賢守令誘掖獎勸黽勉維持以振起之則徒有其名而無其實曷足以致此哉嚴陵為浙名郡學校之政初未嘗或弛故其士習之美賢才之盛至於今而弗替雖廟學完圯不常此固物理而又得太守如葉公與

前守貳寮屬暨師儒賢俊富家巨室相與綱維樂為之  
助俾仆者起弊者新漫者飭堂筵嚴整俎豆靜嘉不惟  
聖賢之靈洋洋如在而凡為師生者亦得以雍容揖讓  
乎其間以講明聖賢之道是豈不為斯世之盛美乎故  
不可以不記也遂樂為記之使鐫于石庶後之人得有所  
考焉

山西大同府重修儒學記

學校王政之先務教化之本原自古帝王莫不興學育

賢以隆治道故學校興賢才盛而教化行我朝混一以  
來尊崇文教自京師達于郡縣雖遐陬僻壤莫不建學  
設官以教育賢才登貢以時選用有法五六十年之間  
髦俊彬彬布列中外攄才效能以輔成太平雍熙之化  
者何莫不本於學校之教也其盛矣哉山西大同即古  
之雲中為西北名郡永樂癸卯冬予以扈從車駕北征  
因奉命出使大同留寓旬日時躬謁先聖周覽殿堂圯  
壞弗堪退見諸生濟濟在列有揖讓禮義之風因憮然

興歎以為群公鎮戍于茲者當有以作興之且以凡物之興廢蓋自有時然亦必遇其人之賢達而後可以有成也去之又二三年廼有明詔修舉學校而山東叅政丹陽沈公固適以練達之才承命往贊邊務因詣廟學遂言於征西前將軍武安侯合肥鄭公亨叅將都指揮舍山曹公儉暨山西都行二司都指揮滁陽羅公文等各捐貲聚材以為倡并召所部兵民各輸其力悉撤其舊建大成殿暨兩廡櫺星門崇峻宏敞偉然有加重塑聖

賢像鐫刻神位龕帳案座靡不整嚴塗徑堦除甍甍端  
好并修明倫堂齋室神厨庫房庖湑之所栖息之舍無  
不完具丹漆黝堊煜然一新經始於洪熙元年之秋九  
月落成於宣德二年之夏五月廼奉書幣請予文以為  
記惟國家列聖相承其於學校之政皆惓惓致謹賢才  
之興日新月益爰自唐虞三代以降莫此為盛矧斯郡  
密邇畿甸文物之富與他郡異况師範得人生徒務學  
而又幸際諸賢相聚于茲皆能潔已奉公以祇承朝廷

德意然則學校之教其有不興者乎予既念昔遊之慨  
歎樂茲學之重新而又喜諸公雖當邊務之繁知聖道  
之尊與學之重可謂知為治之本而識慮過於人遠矣  
因備書其本末俾刻于石以示四方來游來觀之士皆  
知所勸焉

白鶴山房記

榮家建寧去城東二里有山高壯雄偉其勢昂然望之  
若鶴按郡誌云東晉時有望氣者以為山有靈秘將發

而觀之朝鑿暮合已乃見白鶴雙翔其上遂不敢發因  
名曰白鶴山嘗有甘泉湧出其麓病者飲之即愈傍有  
真如寺寺西南地勢隆起狀若伏龜兩水交流于前而  
紫芝鐵獅雲際梅仙諸峯爭奇獻秀巍然對峙左環右  
抱前拱後挹風氣凝會蓋隱然一善地也人多求葬而  
不可得榮先大父存日種德積善孝行純至既歿而窀  
穸未卜方是時真如寺僧無涯將有所營建而乏材乃  
邀鄉先生蘇公明遠踵門求施先伯父彥禎即集兄弟

予以龍津之木三萬株兼資以運輸之費僧大感悅其  
後知先大父未塋遂舉其地以奉且曰此嘗有人酬以  
重價而吾弗之許誠有所待者願以是為報於是筮之  
而吉遂奉柩藏焉塋已人或以得地賀伯父及先公戚  
然曰先人體魄得安於此幸矣他非所望也塋後數年  
無涯歿其徒昧所自因肆侵削已而愧悔復以塋外餘  
地來售榮復厚償其直遂創屋其傍為子孫守塚之所  
太守芮麟扁之曰白鶴山房并為之記榮游郡庠時嘗

率群季讀書其中自後忝科第列職詞林叨承眷遇光寵極矣是皆先人遺澤所庇故能獲此朝夕思欲報上之恩與先人之德顧惟菲薄有所不能公退之暇追惟故山白鶴之勝實先塋之所在松楸霜露之念無時不存因請善畫者為山房之圖將求賢士大夫賦詠以昭先德庶傳之弗泯少紓榮拳拳之思也詩曰欲報之德昊天罔極誠以世之孝子慈孫之思慕其先者無所往而不致其意而榮之於此豈能忘也因書為記俾後之

子孫知山房之所始焉

存心堂記

王氏以醫鳴世久矣其先世家金斗曰德孚者仕宋大理丞子永嘉判楊州南渡時遷淞元之世曰宣伯者徙晉陵隱居鎮江黃鶴山始為醫藥濟人子致和仕為揚州路醫學提領聲著于時曰貴和仕為教授尤為人所推重教授之子克明能紹先志益勤所業以擅名譽壬辰間自晉陵避地龍潭洪武初召入京師尋寓鳳陽從

太宗文皇帝之國居今北京蓋十數年年八十三而終其為人敦厚質實孜孜以利濟為心治人之疾多有竒效而又工于文學以是文皇帝極愛重之嘗呼其字而不名焉其子彥昭克纘遺緒名譽益振間請於予曰吾家以存心名堂蓋百餘年而未有文以記之幸賜一言不惟有以著先世之美為子孫者亦永有賴焉予惟心者人之神明具衆理應萬事操之則在舍之則失是以君子無時無處而不用其力焉况醫道於人死生所係

苟心有不存其不至於謬誤舛錯以戕人之生者幾希  
今王氏世儒而業醫又能以存心名堂為子孫者世守  
其訓則其惠利及于人者豈不遠且博哉詩曰無念爾  
祖聿修厥德又曰子子孫孫勿替引之其是之謂乎彥  
昭有子曰讓曰謙聰明俊秀好學不倦而又循循雅飭  
親賢士大夫日進月益將必昌大其門閭振揚其家聲  
不啻於此而已是為記

華鄂堂記

伍氏南昌著姓世家邑之杜溪至漢用者克敦誼讓推  
祖父故業與諸昆弟獨徙居灌城鄉之懸榻里家益饒  
裕而好善樂施之心弗倦人以是多之漢用去世子伯  
遜伯暘伯遠伯璣篤友于之義不為私藏凡諸舉動一  
惟伯遜之命是聽口以百計而內外翕如也賓客過從  
兄弟怡然相與款遇蓋簞之序行鴈行森列墳簾迭奏  
和氣藹乎一堂之上見者嘆羨不置因舉常棣之華鄂  
不韡韡凡今之人莫如兄弟之詩歌而美之且舉酒賀

曰斯堂宜名以華鄂堂既得名而未有為發其義者伯遜子渙領鄉薦進為太學生擢貳教吳江縣學將行謁余具道其家名堂之意而請記之惟兄弟分形連氣人也方其幼時食則同案學則連業未始不相友也逮乎既長私意物欲或汨其良心弟或弗念天顯不恭厥兄兄或不念鞠子哀不友于弟小則閤牆甚則分析門戶相視如途人以貽士君子之誚者有之今伯遜兄弟去父歿時幾三十年而能篤於恩誼不異財產庭無間言

使邑里聞見者咸興起感慕其有補於風化亦大矣揭  
扁華鄂夫豈不宜吾故為之記而繫以辭曰瞻彼棣華  
煒兮相承式相好矣維弟與兄兄弟孔懷不私其家孰  
堪儗之維棣之華棣華鄂然外見其美有聯其輝維兄  
與弟兄及弟矣和樂且湛不貳以二弗參以三惟一其  
心終始是同張仲孝友穆乎清風

歐陽文忠公祠堂重創記

甚矣文章之洗陋習而歸諸古著當時而傳後世者不

恒有也宋歐陽公之文足以當之宜乎後之人讀其文而思其人思其人而崇其祀也公吉之永豐人嘗出守潁樂其風土有終焉之志既而歷事三朝出入二府思潁之念不忘晚而得請自以為慶幸則公之於潁盖惓惓也神靈精爽固在於是矣公舊祠在潁城北淪于河祀故久廢正統丁巳春監察御史彭勛董學事至潁念公為文章宗主而祀宇圯沒無以聳學者高山仰止之思乃捐貲倡州守僚屬出祿餘市材創祠于城南儒學

西中為堂三間門為屋一間繚以周垣工訖郡之守佐率師生朔望謁拜春秋次丁祀以特牲父老咸曰公嘗福惠潁人祀不為過也學正雷壇請記於予於戲文章闢天地之運盛衰斷續固不偶然周秦以前無容論矣漢自賈董馬班諸子以來七百餘年而唐有韓子又二百餘年而宋有歐陽子其文推韓子以達于孔孟一洗唐末五季之陋當時學者翕然宗之及今四百年而讀其文者如仰麗天之星斗莫不為之起敬雖通祀於天

下學宮不為過矧嘗居於頴其遺風餘澤猶有在者乎  
是不可以不祀也彭君倡之郡僚屬和之俾公之神有  
所依後學有所仰可謂知所務也它日頴之士出能知  
通今學古為高救時行道為賢則無負諸君興廢舉墜  
之深意矣姑為之記以俟

餘慶堂記

江西布政使司左叅議田君伯邑余之同門友也其材  
器宏偉而學識博達以明經登永樂甲申進士第歷官

郎署起拜今職聲績焯然時論莫不以為賢然君之心則不自足也恒念曰吾幸蒙國恩備位藩垣皆吾先人積德之所致吾豈敢忘哉乃顏其所居之堂曰餘慶蓋取易文言積善之家必有余慶之義也今年冬君以朝賀來京師因請余記之余惟天人之理流通無間循理而行則善積而致慶悖理而行則惡積而致殃不啻如桴鼓影響之相應焉然君子惟知循理而已初不必其獲慶於天而天之錫慶不於其身必於其子孫若持左

契以相付此天之可必者也余嘗序君族譜因得考其  
世德蓋自君之高祖以降代以儒術從官司風紀錄刑  
獄者相繼而皆長厚務德其所積深矣積之深者發之  
盛君之所以致位顯榮而克允厥宗者豈偶然哉雖然  
不有於前孰為啓之不有於後孰為承之今日之慶固  
由其先之所積其後之慶豈不由於今日之所積乎矧  
君位居方岳其所設施則一方之民被其惠利苟推仁  
不已其善之積而致慶於後詎有涯哉然則君之世澤

不惟有以承之抑且有以大之也傳曰德厚者流光余於田氏有望焉庸記以俟

建寧重修府學記

學校有關於政教也尚矣任是責者不可不究心然欲舉廢墜勤力役必於民生富庶之餘而後可建故有學在郡治之南嘗毀于回祿昔太宗皇帝銳意文治有司以聞詔擇勝地改創之前太守芮麟教授張信乃相黃華山之陽而建焉幾三十年復就摧毀今教授彭勗當

太守徐公子玉下車之初首以修復為請公曰是吾之所當究心也然必資民力以成民未見德而遽勞之不可姑少俟焉至是政成乃與同知姚聞通通判蔣祐暨勗議其材用之費經畫之方捐俸倡率各有差等不足則資郡人之篤於義者既而量時命日擇敦朴耆民四人董其役材選其良工會其能用出有經役赴以期梁棟之傾者正之榱桷之腐者易之瓦甍之毀缺者補之轉朽敗為堅完新舊規為偉觀嚴嚴翼翼穹壯宏麗丹

碧髹堊煥然生輝帷幕器用靡不備具又以餘力創尊  
賢堂祀郡先賢之有功於名教者經始于某年某月日  
迄工於是年某月日凡士之遊泮水者有思樂之懷縉  
紳大夫之過建郡者興嘉美之歎建安教諭楊壽夫郡  
人也謂是役之成不可以無紀貽書京師屬予為記將  
刻貞石告于方來惟建為郡居七閩上游詩書文獻之  
盛甲於東南晦庵西山二先生之流風餘澤迄今猶存  
重以國家培養之厚而吾建人賴有所立以表見於世

非偶然也況今聖天子大興文教屢勅天下勸學政而公又能欽承德意振起士氣重新廟學於民事既治之後而適緩急次第之序如此是可書也嗚呼建之君子游業於此者可不知所以景仰而益勵志於學乎夫學非章句文辭之謂也所願學孔子然後不負所學致君為堯舜然後不負聖天子若是則吾建詩書文獻之盛將千萬年有聞於世斯不負朝廷教學與太守修學之意矣予世家于建而竊祿于朝今年逾六袞日漸衰老

建大功立大名以永國家治化無窮之美誠不能無望  
於後學也初學之建也予既記之茲復來請故不辭而  
致意如此云



文敏集卷九

欽定四庫全書

集部

文敏集卷十

詳校官編修<sub>臣</sub>裴謙

中書<sub>臣</sub>劉源溥覆勘

總校官中書<sub>臣</sub>朱鈐

校對官學正<sub>臣</sub>常循

謄錄監生<sub>臣</sub>徐汝雄

欽定四庫全書

文敏集卷十

明 楊榮 撰

記

重修河南程氏三先生墓祠記

凡先賢所當祀而祀之禮也立祠於墓以祀者禮從義起者也祠久而僨僨而興者常也常則不書而書者大復故也河洛於天地之中扶輿清淑之所鍾賢哲之生自昔林林而盛矣然莫盛於宋程氏父子三先生者程

氏世居嵩之陸渾三先生卒俱葬洛陽縣之府店保遺墓至今具存墓側有祠後人以為享嘗之所歷歲滋久薦罹兵燹向之隆者夷壯者弊茂管宿莽一視蕩然誠當道者所宜究心也錢塘周鑑自郎署出參藩政歷是邦觀之慨然即有志於興復第縻於職務弗果宣德辛亥春皇上圖弘化理重惟古昔聖賢之道乃頒明詔凡天下郡縣有先聖先賢祠墓在者所司宜以時修葺毋就于廢鑑祇承德意樂以斯事自任遂以其秋行郡道

經嵩邑抵程氏故居得其十六代孫日子中者與同詣墓所雜去荒穢辨正方位先捐已俸為倡河南守郟城李驥及屬邑令佐亦以其俸助之遂召工計資凡所需之物則取於近邑所宜產戒以期輸集無敢緩者以是年某月某日之吉興工工能材良需用咸足於某月某日告成垣墉棟宇皆復舊規封築堅厚樹植繁密凡所供祀之器莫不畢具以某月某日立開國公神主於祠之中以明道伊川二先生侑食依故制也復于中家俾

守祠事遂率郡屬祇奠焉奠已諗于衆曰惟是三先生之墓自宋至今餘三百載其間廢興者幾漫不可知顧念吾徒誦其遺言服其遺訓用底有位茲得奉明詔以周旋執事於故丘之間幸爾訖事要不可無書雖墓間之石有當時銘表在無庸重述而祠之興作歲月不有誌之將何以示後衆皆曰然鑑比以公務來北京屬禮部郎中兼翰林侍書蔣暉請予記其事予惟道統之傳自吾夫子繼堯舜禹湯文武周公之後集其大成而不

得位以行於天下遂私淑於其徒然在當時惟顏氏  
曾氏之傳獨得其宗及曾氏之再傳而子思三傳而  
孟子孟子沒其道無傳寥寥千百載間不絕如綫迨  
宋之興文運斯振而明道伊川二先生出孟氏之傳  
乃續而其學之所自實本濂溪周元公茂叔方元公  
司理南安時開國攝通守事知其賢深與友善因遣  
二先生從學卒能以其道倡天下傳於後世人至於  
今賴之是二先生之功當不在孟子下也宋季臨邛

魏華父氏拳拳以二先生易名爲請遂定謚伯曰純公叔曰正公皆得從祀先聖廟廷此天下之通祀也天下通祀則墓祠不立可也而墓又有祠蓋墓祠則猶廟祭一家之私祀也通祀以道統之傳惟二先生得與其列私祀則推其所自出而開國公擇師教子之賢是不可泯也揆之於禮殆亦弗畔矣夫然則祠之廢興歲月其誌之也宜嘉鑑之能知所重因其請謹爲之記

### 三桂堂記

禮部侍郎章君尚文作堂於會稽山之陰其鄉士大夫相與名之曰三桂之堂堂之前植桂固多矣而以三云者何自晉郗生對策有桂林一枝之喻歷唐宋來遂以艷科目之得雋者曰折桂章氏繇宋迄今舉進士者凡三人故有取於是也尚文世家於越高大父諱斌宋景定之間鄉舉第一人值末運仕弗大顯傳三世俱以隱德重鄉邦大父暨父以尚文貴皆贈嘉議大夫禮部右

侍郎尚文登永樂甲申進士第八翰林典郎署累遷至  
今官子瑾宣德丙午領鄉薦正統紀元遂擢進士高科  
此堂之所以名也堂峙湖山之門其北為稱山山枕大  
海出雲氣而吐光景朝夕不窮南為稷山一名齋臺則  
越王勾踐祭天之所在焉又其南天姥秦望諸峰凌霄  
漢而隱烟霏鬱然相向娥江耶溪之水環繞其左右而  
唐所賜賀知章鑑湖一曲者實相屬焉波光山色竹樹  
映帶奇舒秀卷不一可名此居之勝而得其地也夫綿

世澤而盛者人之賢鍾川岳而秀者地之靈人以地靈  
地因人傑章氏之桂不特一世有之傳世逾遠而得之  
者凡三馬是豈偶然之故哉雖然推厥所由亦惟本諸  
德而已耳姑以桂譬之玉幹瓊枝植之良也密葉繁陰  
積之茂也金粟天香華開之盛也傲歷風霜志操之堅  
也故君子有取於桂者不徒擬其榮又將資以比德焉  
尚文之高大父名魁多士大父而下雖未達而均膺寵  
贈德可徵矣尚文以高才碩望顯于朝三十餘年而瑾

又克繼志濟美振揚於今雖本世德之遺亦以尚文承  
藉啓迪之致也繼茲以往因其植之良而積愈茂因其  
華開之盛而志操愈堅吾見德厚而慶延他日後之人  
於斯桂高攀旁折也不可以數計矣然則斯堂之揭得  
不為之權輿乎是為記

蘇州府吳縣儒學重建記

蘇為東南望郡吳縣蘇之望邑也儒學為一邑之望而  
或施教無所瞻仰不稱善為政者得不究於心乎然興

學盛事改作大役也舉大役而使勞費一出於民其得無怨嗟之聲而克底完美者乎若夫知所究心事底完美而不動聲色得不難其人乎吳縣學舊在城西南隅賓興坊其地卑隘廟學皆簡陋旁逼軍營喧雜相接春夏水潦四集牆壁傾仆誦習常輟郡縣之長貳暨師生往往興慨欲遷改之而未有能當其任者宣德七年工部右侍郎廬陵周君忱奉命撫巡東吳諸郡偕知府豫章況君鍾同謁廟學見其不稱因協謀更造之得隙地

于縣治西南視舊學地廣四倍高爽平曠衆咸謂宜况  
君具其事得請于朝二君復相與議曰是役不可重費  
吾民遂計郡之諸倉歲積葦席得五十餘萬鬻米可五  
千餘石凡材石陶瓦之資匠作力役之需悉於是取給  
而一毫不干於民復擇耆民王信許均美董其事經始  
於宣德九年冬十月訖工於明年夏五月以日計之二  
十三旬有奇成功速而人不知其勞享禮有殿講誦有  
堂藏書有閣宴休有亭以及門廡齋舍庖湍各以序列

通為屋以間計之二百三十有餘材用堅而人不知其費其既成也父老歎曰廟學不稱久矣一旦更新於數百年因循之後而不以病民席之積屢矣昔也不侵盜於吏胥則腐化為埃塵今乃以之成一邑之偉望何其善也既而知縣某教諭李讓等具其始末走書京師求予記惟學校王政之首教化之源也我國家列聖相承興學育材六七十年于茲矣校庠之盛振古未有是以絃誦之聲郁郁泯泯溢乎遐邇而賢才輩出裨贊鴻化

後先相望亦莫不由良有司欽承德意以振作之然其  
改作有方若吳學之建者亦不易得也二君子信謂善  
於究心者矣來游於斯者尚知力學求道篤志勵行期  
不負聖明造就作養之仁將必效用於時垂芳於後以  
為斯學之光則二君子之用心亦必傳誦於無窮矣是  
為記

涼州儒學記

聖朝統一寰宇自國都達于郡邑皆建學立師教育俊

秀仁義禮樂之化旁洽海隅徼塞人才之衆風俗之美  
度越漢唐而比隆虞周猗歟盛哉涼在西陲即古雍州  
之域在漢為武威郡地利物產視河西諸郡為美國朝  
洪武中設衛置戍而戍者多南士謫至子弟相承讀書  
習禮而訓導張子受命教育之儒風為之勃然歲滿還  
京而未有繼者今皇帝嗣位特命行在兵部右侍郎徐  
君晞鎮其地覩將校子弟多明秀好學而未設學舍以  
為講肄之所遂以請于朝得命乃於農隙令軍士取材

陶甃而經營之既畢工走書京師告予曰涼州河西勝地初嘗有學然廢已久矣晞至相地鳩工中為明倫堂左右為存誠進德二齋外建重門後為教官之居續創大成殿於堂之東殿以崇計二丈有九尺深幾倍於崇廣則幾倍於深東西為兩廡前為靈星門中為泮池池之東為文昌祠祠之東池之西俱為門外又為崇教門俾往來出入皆由焉其捐資命工塑先聖以下及文昌神像並繪兩廡者則鎮守甘肅太監王公貴少監李公

貴總兵寧遠伯任公禮定西伯蔣公貴會川伯趙公安  
暨都察院僉都御史曹君翼巡按監察御史馬君昂陝  
西參政郭君堅按察副史于君奎署都指揮使事任君  
啓與凡士庶共成之其置聖賢以下牌位者則兵部侍  
郎柴君車始終督視繕作且有所營助者則僉都御史  
羅君亨信勸勞羣工俾樂於趨事者則監軍行在兵部  
尚書王公驥自丁巳夏經始至落成幾二載壯偉閎耀  
為隴右學宮之冠衆咸謂宜記于石庶後之人有所考

見敬以請夫學校政化之本賢才之所自出也學校立則禮義興風俗美孟軻氏曰三代之學皆所以明人倫也人倫明於上小民親於下非政化之本歟今徐君乃與諸君子同心協誠建學宮於邊陲之地嚴嚴翼翼巍然煥然使涼之學者升降俯仰於其中誦聖賢之訓言而仰其道德之光涵養薰陶底于成材居而孝於親仕而忠於君則是宮之作其功豈淺淺哉若徒由此以邀利達而於臣子之行無所砥礪則不惟負國家教養之

意而亦為君子之所共羞嗚呼學于斯者可不知所務哉用是以復徐君之請俾勒諸石庶以為學者勸云

翕和堂記

余幼時聞先生長者言守建寧千戶韋楊二公好文禮士人皆愛慕之謹識之弗忘其後韋有子任汀州衛指揮者歲或見焉獨楊公之嗣轉調他所二十餘年蓋未有能知之者及余兩以扈從來北京而楊信中孚忽偕行部員外郎吳公嘉靜來謁余故詢之則曰信之父嘗

仕建寧為先生之鄉乃敢求見余觀其胸懷磊落言動  
謙恭遂留止宿因命觴引酌笑談甚歡於是中孚乃歷  
道其父昔日所交遊者皆吾鄉之先達也酒酣拜且請  
曰信世家西江之鄱陽昔南土內附吾父以功授武毅  
將軍建寧右衛千戶吾父存時篤好文雅嘗於上西河  
之寓舍植竹萬竿以竹所自號賓客過從者皆賢士大  
夫其所唱和詩文至于今翰墨宛然也信兄弟少時亦  
皆從遊志齋趙先生之門其後以襲職調守大同兄弟



如五音之合奏溫然如春陽之發舒和氣冲融貫徹無間孝友之至通于神明則其名堂也不徒誇美於一時將以垂訓於來世其意若曰今日吾兄弟翁和如此吾父母安樂如此自今以往吾之子子孫孫皆如今日堂可不作也苟惟不然則必忿氣相加視為敵仇閭牆紛臂相繼而作其不至於傷風敗俗者鮮矣安求其能翁和哉昔孔子誦此詩而贊之曰父母其順矣乎誠以人能於妻子宜於兄弟則父母其安樂之矣中孚宜三

復此詩日夕警惕以為明訓凡一毫有動於血氣而傷  
於和者勿作一毫有乖於禮法而損於和者弗為移孝  
為忠推和為惠將見德業日新而聲光益著不啻於此  
而已中孚其益勉之

常熟縣重修廟學記

宣德癸丑常熟縣重修孔子廟學成吏部稽勲主事錢  
衡世家斯邑少常遊是學來請於予曰學在縣治東南  
其地隆然以高宏然而敞初始於宋至和重修於開禧

端平而再葺於元之皇慶至正其間政教興替靡常未  
可以槩舉也洪惟國朝文教聿興洪武庚戌教諭朱昞  
來掌教事時學之制左則殿廡戟門櫺星之赫奕右則  
講堂齋舍庖廩之畢具其後則有子游祠及先賢堂蔚  
然可觀歷歲滋久上雨旁風漫以圯壞未有能振之者  
近西江羅汝寬典教茲邑慨然欲作新之計其工費浩  
繁慮有弗給乃先度其力可為者為之若廊廡講堂門  
垣齋舍及先賢祠宇皆循次修葺惟禮殿未之能也壬

子之秋縣丞李子廉主簿郭南暇日視學宮見汝寬用力之勤亦慨然曰修學責在有司吾輩視其頽廢而不加力寧無愧焉乃各捐俸以倡訓導徐萬溢翁玘力贊助之命諸生某等督其事衡適得請于朝歸省墓乃奉白金四百星佐其役仍率邑之好事者某某捐貲以助於是聚材鳩工殿之梁棟榱桷瓦甍牆壁之毀者易之帷幙器用之敝者新之聖賢像設章服則繪飾之與汝寬先事所修葺者輪奐華采相為炫耀焉是役也不煩

于官不擾于民而卒以時就誠可謂難矣敢求一言以  
示不朽余嘉佐邑及典教者之得人又嘉衡之能輕財  
而知所尊也故不辭而為之言曰學校育材之地風化  
之原為國者之先務也天啓皇明大一統文明之治開  
萬載太平之業在內則立冑監在外則府州若縣莫不  
有學而學之教法規制蓋已超軼漢唐宋而娓娓乎唐  
虞三代之隆矣皇上嗣登寶位尊崇儒道凡一言一動  
莫不師法孔子以弘堯舜之治是以屢詔天下修理廟

學然郡縣之吏能奉承者鮮常熟邑佐及典教者咸知  
所重一新學宮可謂能祇順德意者矣夫常熟乃子游  
過化之地子游聖門高弟也自今縣之令佐與夫為師  
生者優游于茲當何如哉必景仰賢哲修舉學政且務  
其為已之學盡乎孝弟忠信之道勿徒銜名譽徇利祿  
以負國家建學立師之盛意則庶乎其可也敢以此復  
衡之請且告其邑人焉

重修文公朱先生祠堂記

徽國文公朱先生祠在建安郡城北之紫霞洲蓋宋寶  
慶三年正月所建以奉先生之祀者也歷元迄今幾二  
百年棟宇頽圯上雨旁風其弊壞可謂極矣國朝永樂  
乙未監察御史蔣彥祿給事中陶偉巡部八閩至于建  
安躬謁祠下相與言曰先生發明聖賢之道羽翼六經  
折衷羣言以嘉惠學者有功於天下後世甚大建安為  
先生過化之地其有祠宜矣而歷世滋久廟貌若斯何  
以稱士民之瞻仰乎盍相與新之於是福建行都指揮

使司都指揮師公祐侯公鏞徐公信郡守劉敬議以克  
合廼命耆儒許弘暨先生之七世孫鐵董其事仍率邑  
之賢者相與捐貲出力庀材鳩工凡堂寢門廡以及衆  
屋撤朽易堅葺弊為完仆者植之敬者止之黝垺丹漆  
煥然畢具經始於是年春正月竣事于秋八月於是建  
安縣學教諭楊壽夫具其本末謁予以記其成予邑人  
也奚可以辭惟聖賢之言載之經傳所以發至道之蘊  
奧者固無不明且備矣然而煨燼於秦火剝蝕於漢儒

議論紛紜穿鑿傳會學者俛俛焉莫之適從而羣聖人之道幾乎熄矣迨至宋濂洛諸大儒相繼而作闡幽發微以明聖賢之道上續夫千載不傳之緒可謂盛矣而其後又有若先生者傑然特出著書立言擴先聖之未發正諸儒之乖誤剖析折衷無復遺蘊然後聖人之道昭然如日之行天先生之功其所謂集大成者歟雖然先生之道德天下後世之所共仰而尊之者豈特吾建安為然而祠宇不稱一旦諸君子作而興之偉然舊觀

此不惟一時之瞻望而已有志於聖賢之學者安知不緣此而遂為之興起乎然則是舉也其所關係又豈小也哉予實有望於建安之士也遂樂為之記焉

忠孝堂記

臣子欲報於君親其道莫大於忠孝古之人所以勒功彝鼎垂名竹帛與天地相為無窮者豈有他道哉亦惟盡此而已苟於此有歟焉惡能有所樹立以報國家以顯大履親而著名臣賢子之聞於天下後世哉故必於

忠孝胥盡而後可也邳州衛指揮使趙本立世家臨淮其伯大父德勝事太祖高皇帝有大功贈開國輔運推誠宣力武臣榮祿大夫江西行省平章政事柱國同知都督府事梁國公大父端亦仕至廣東都指揮同知父麟襲為福建興化指揮使兄弟父子竭力効勞以罄人臣之忠者至矣而其顯親之孝亦於是而有徵焉宗立能心先世之心恪勤厥職恒懼其久而或忘也乃揭忠孝二字以名其堂間致書京師請記於予嗟乎自昔武

弁之家相承既久其後人往往溺於富貴鮮克念祖父  
樹立之艱遂致顛覆爵位者多矣其於忠孝何有哉夫  
忠孝之推也能追念前人而致謹必能盡誠於國而効  
力今宗立以世勲之裔而能廉慎以自持仁恕以撫下  
夙夜在公期以上報朝廷下慰祖考忠孝之實度越常  
流遠矣其爵位之隆所以匹休先烈者未可涯涘尤且  
不自滿足揭扁堂楣冀朝夕覽省以致勵於心懋建勞  
績以有譽於天下後世誠可謂不負於君親而與古之

名臣賢子同一轍也是宜為之記

榮親堂記

人子之於親其所以愛敬奉養無所不極其至而又必欲及見其身之富貴以顯揚之然後以為榮焉此臨川張氏榮親之堂所以作也張氏為郡故家歷宋與元簪纓不替今雲南道監察御史士貞之父思魯與母姚氏積善裕家義方克教俾士貞得游庠序早領鄉薦釋褐辛丑進士而拜今官士貞初登第詔歸其鄉而父母康

強具慶兄弟在側一旦以士貞蜚英科第衣錦言還稱觴獻壽荷恩命之光華侍高堂之宴樂於是族人父老爭持羊酒交相懽慶為題其奉親之堂曰榮親蓋所以嘉美之也間來徵予言以為記予惟子之於父母以口體為養者不如順其心以晨昏為禮者不若承其志至於富且貴雖足以為親之顯榮而或不能承順其顏色奉養其志意則雖富貴烜赫亦徒為閭里一時之榮而已士貞讀書績文一舉而擢高科筮仕之初即任風紀

清要之職俾二親及見其顯榮而怡愉無不自足宜乎  
族人父老以為榮而相與名其堂也雖然士貞不可徒  
為閭里之榮於一時尚思居得為之地際可為之時知  
無不言言無不盡清操峻節內外一致使人皆目之曰  
士當如士貞之才且良出於科目效用當時以能榮其  
親如此則斯堂豈不益有光耀矣乎姑為之記以俟

愛日堂記

愛日堂者戶部員外郎羅通學古奉親之堂也堂而名

之以愛日者何哉蓋學古祿仕二十年而數去其親常以謂日積成歲人之壽隨以加也今父母老矣其方來之日寧能多於已往之日乎人生雖以百歲為期然能百歲者蓋無幾則夫晷運之速豈不誠可惜哉揚子云不可得而久者事親之謂也孝子愛日吾於此有感矣此其名堂之意也夫愛者七情之一性之動也有善焉不善焉動而仁義道德之是尚者善也聲色貨利之是從者不善也學古之愛日其本於仁義道德之動者乎

愛日者愛其親也因愛親而愛日焉其為孝可知矣古之論孝若子游之於敬子夏之於色均所難致求能養志而致於道者曾子而已故曾子之孝聖賢之所與也學古克愛日之心其有得於此乎嗟夫孝德之本也推之以為臣而忠故曰孝始於事親終於事君學古以明經取進士為御史多所建明及知交趾清化州有愷悌之政城守之績此非孝之推乎今父母偕老在堂尚康強無恙諸昆弟之家居者皆能備物以致養已雖不得

朝夕侍左右然居官有善政足為父母榮且不貽其憂  
所謂養志蓋庶幾矣予嘗聞古之人以孝著而致夫遠  
大者不少也學古力強而志銳今受任行邊凡糗糧芻  
茭所以供軍旅壯疆場者皆學古事也其任不輕矣盡  
心於其職而致顯榮膺褒命以為父母之光榮者又奚  
可量耶學古以堂記請於予故書其實俾歸寘諸壁間  
非徒以慰學古之意亦以慰其親之心

悠遠堂記

予嘗求夫悠遠之義大矣哉天地之覆載日月之照臨  
四時之運行與夫人之所以充積涵養著於當時傳於  
無窮者莫不有悠遠之道焉吾鄉童景祥氏先世家廣  
陵唐季避亂始入閩郡占籍于建寧至宋有諱伯羽者  
嘗從晦庵先生受學景祥實其裔也景祥讀書好禮鄉  
鄙賢之嘗慨然曰自吾祖宗至建卜築南山下數百餘  
年以至于今而詩書文獻之澤弗替自非積累之厚繼  
述之美曷克致此廼作堂名之曰悠遠蓋以表先世之

德使後之子孫得景仰而興起焉間以予有姻戚之好  
因其子文安來北京請文以記之予惟悠遠即悠久之  
義夫悠久者天地之道所以成物者也故人生天地間  
亦莫不有悠久之理養生以寡慾居易以俟命此一身  
之悠久也積善基於前樹德承於後此一家之悠久也  
景祥自其上世以衣冠之胄衍慶垂裕於其子孫者固  
為深厚宜乎後之人益蕃且盛而不至於失墜其先業  
此豈非深知夫悠久之理而能得夫悠久之道者乎名

堂之義蓋不外是矣世固有闕閱地望赫然而興震耀于當時自常情觀之蓋以為非尋常所及然而曾不一再傳則已泯焉寂焉無復有聞於世矣如此者抑安知夫悠久之道哉為人子孫若景祥者可謂賢矣予他日獲遂南還尚一登景祥之堂挹南山之翠酌玉溪之泉弦琴賦詩相與叙悠久之說豈不樂哉故為之記

守泉堂記

國朝肇造區夏治教休明既簡賢任能以熙庶績猶懼

中外百司之職律已不嚴至有簠簋不飾而喪其所守者乃於大誥首編特舉守俸如井泉為喻聖謨洋洋所以開示飭戒乎臣下者抑何至歟列聖相承甄陶造就逮今五六十年而凡有官守者咸知佩服警勵以保其祿位若今武功左衛指揮同知泉寧白君行素其人歟行素器宇俊偉聰敏過人雖生長武弁而弓馬韜畧之餘兼習儒書敦禮義既襲其父爵以掌戎衛之政廼名其所居之堂曰守泉遵聖訓也屬以營繕督工得謁予

於公卽拜請為記惟朝廷設官分職必豐其廩餼使之  
仰足以事俯足以育者無非欲養其廉恥之行俾得盡  
心竭力以舉其職故為臣下者嚴恭寅畏夙夜匪懈雖  
不計其祿俸之入而祿之至者但見與月俱增與歲俱  
積取之無窮用之不竭譬若井中之泉以資於日用旦  
而汲焉恒見其有餘夕而汲焉無時而或涸也仕者之  
有祿亦豈不類於是哉苟居官而公不足以勝私廉不  
能以節欲侵漁朘剥惟利之是圖培克聚斂捐軀而不

顧是雖貲賄充羨盈溢比於常祿固或過之而壞名辱  
身遂底傾覆則雖常有之祿一旦遂絕矣豈不猶秋霖  
夏潦驟至而卒來轉盼之間溝澮泛溢然其涸也又豈  
待旋踵之頃歟行素席祖父餘澤腰金鳴玉安居暇食  
自常情觀之可以優游逸樂日事奢靡以極夫膏粱純  
綺之盛而乃孜孜然惟知佩服聖訓以檢身礪操思有  
以保其常祿而弗敢有過分之求此豈非賢哉然則登  
斯堂也覩御詔之遺編聆玉音之在耳不徒侈為楣扁

之美觀尚其凜焉而思惕焉而懼兢兢焉以持乎廉潔之行而弗少變則非惟可以保祿位於無窮實足以流芳聲於永世矣斯堂豈不益有光輝焉

璜溪書舍記

七閩多佳山水而建安璜溪為最溪之流上接武夷下會鐔川波光滉漾有聲琮然而其勢委曲若璜焉故曰璜溪清激瑩澈靈秀之氣鍾于人物自宋元迄今世家大族厦屋鱗次學徒文士聚處其間燈火之夕絃誦之

聲相聞故擢科與貢者代出不乏吾友雷氏彥器實居  
于斯而其先世所築璜溪書舍在居之旁秀峰屹乎其  
前清流映帶其下修篁嘉木森然成列彥器定省之暇  
藏修游息誠得其所予幼時嘗見諸父與雷氏交游或  
酌酒賦詩于書舍之中或嘯歌游釣於璜溪之上每終  
日留憩其間樂而不倦予深識之其後予入郡庠幸得  
從策明先生又與雷氏諸賢若尚質原中原鼎祐之彥  
器有融輩契厚時常往來璜溪以燕休游息於書舍焚

香啜茗相與講論經史問難質疑以求麗澤之益如是者不數年予與尚質原中皆來京師既而祐之亦由進士任監察御史彥器亦升太學擢冬官主事而與璜溪書舍相違有年矣今彥器尤惓惓於此而不釋者得非眷戀於其平昔之所游止乎彥器嘗曰吾幼蒙恩育得以優游于書舍者皆賴父兄之教師友之助有以成其才質今而筮仕于朝叨任繁劇旦夕思惟深愧才有不逮學有未至非有所警飭戒謹於初者或不能要於終

今繪為圖誠非玩物愒時之比實於展玩之際儼若父  
師之在前也豈敢有毫忽自肆乎以公同里敢斬一言  
以相勗予不敢默而為之言曰夫忠君愛國顯親揚名  
在乎立身立身之要必務於學所謂學者當檢制其情  
涵養其性窮夫物理以明諸心審夫云為以篤於行雖  
小而至於飲食起居大而至於修齊治平隨所施為而  
無不適其宜者斯可謂學之成也苟徒誦陳言以為博  
摛藻翰以為華從事科目以徼利達於一時者烏足以

語此哉彥器資質粹美篤志於學凡枉已徇人趨時競利之舉一毫弗足以累其中又幸際遇聖明展其懷抱敦其操履將見聲光益著而陞擢顯庸其所進蓋未艾也予夏云仕而優則學學而優則仕彥器有之子遂不揆蕪陋而為之記他日彥器倘得拜恩南還歸省其以予言質之鄉先生尚毋以為僭妄也

敬軒記

自昔世臣大家之後克承先德以綿世祚於永久者豈

有他哉在乎謹於其身者有其要也要者何曰敬而已  
苟弗務此而驕盈縱逸至沉溺聲色貨利蕩然而不知  
止其不顛覆厥躬以忝厥先者幾希敬之在人所以不  
可跲步忘也若今右軍都督沐公嗣子可怡庶能審知  
乎此者矣可怡嘗構一室以為藏修之所朝暮休息其  
間歛襟端坐披閱經史凝神息慮儼然若與聖賢相對  
其從父駙馬都尉過而喜之因為大書敬軒二字以寓  
規勉之意今年致書於子請記子嘉可怡能知所務以

成厥德又重駙馬公之篤愛其姪而期其進於學是皆可書也夫敬之義大矣哉儒先既嘗以主一無適言之矣又嘗以整齊嚴肅言之焉既有所謂常惺惺法者矣又有所謂其心收斂不容一物者焉之數者克盡用力之方則心有所主而百體悉從令矣由是格物致知誠意正心以修厥身推之以及乎齊家治國殆無難矣故儒先又曰敬者一心之主宰萬事之本根雖聖賢之學亦皆由敬而後有成也然則敬之一言其真聖學始終

之要也歟可怡以軒冕之胄而能脫然於外慕從事於斯以篤所學日用動作必由於規矩法度之正而惰慢邪辟不作於身非確然有見者疇克然哉此余所以嘉之也可怡於斯必進進不已益加夫戒懼謹獨之功務得乎操存省察之實而以聖賢自期則不惟不負駙馬公期願之意誠足嗣承徽美無忝厥先而斯軒之名亦將有聞於天下後世矣姑記于軒之壁以俟

冰月軒記

姑蘇金養正氏以進士擢監察御史嘗扁其宴居之所  
曰冰月軒而求予為記予按易大傳曰乾為冰冰者陽  
之極而陰氣內凝者也又曰坎為月月者陽之中而陰  
精外瑩者也之二者世皆以屬之陰而不知其根於陽  
故雖至寒至陰而其中堅肅而明炳者則屬之陽焉其  
在於人則心也者府是性而官是形者也寂然不動而  
感應必照者非坎月之體乎湛然虛明而至剛弗陷者  
非乾冰之象乎夫人之所以確然而不拔湛然而澄澈

者盖有得乎此也而或外物以梏之私欲以蔽之於是至堅者有時而撓至明者有時而昧焉嘗試觀之炎炎者滅惡知乎乾冰之為象惛惛者溺惡知乎坎月之為體盖世波漫以逝者何限哉必也肅然警飭而後至堅者存淨然澡瀹而後至明者著則冰也月也將不待外求而皆具於吾之心焉養正績學入官職任風紀盖思以至堅至明者恢廓於是心而推以為執法之平振憲之綱以無負耳目之寄者乎宜其於冰月而有契焉也

已想其兀坐茲軒玄冥氣肅澤冰凝洎於是有取於天下之至堅者焉太空無雲桂輪孤照於是有取於天下之至明者焉斯時也至清至明將與吾之靈臺丹府相為流通而凡天下之污濁昏昧者烏得而挽之哉若夫徒取冰清月白以為耳目之翫宴賞之娛斯乃幽人高士之所樂非養正名軒之意也因其請姑為記之

雲卧山房記

兵部主事三山鄭塾學初之養疾而歸也造予言別且

有請曰塾家距郡城一舍許居之東則鼓山巍然劣削  
高入霄漢西則齊坑諸峰錯列屏障其南則方嶠端厚  
秀整若置几然山之下皆大江瀚淪滄滙浩不可窮山  
川之氣蒸而為雲綢繆鬱勃彌綸紛郁而塾適宅於平  
曠據清淑之會讀書之暇開戶而觀之見其出巖扉越  
澗壑披冒乎林木綿冪乎太虛悠揚往來於簷楹窓牖  
間朝暮變化其為狀也多矣塾之意蓋甚樂也年三十  
叨名科第備官郎署今又二十年重惟天地大造之恩

思竭駕鈍以效涓塵之報不幸嬰疾滋久膂力不任茲荷優詔予歸就閒以便醫藥山間之雲當復與之俱而樂矣將扁於舊居曰雲卧山房惟先生賜之記塾歸刻寘壁間不惟山林泉石與有光耀而塾得以朝夕諷誦庶幾疾其有瘳乎予在朝適與學初尋鄉好相往還既久記不可辭乃為之言曰夫觸石而起膚寸而合彌八方而雨下土者雲也然其舒也其卷也曷嘗容心哉學初之仕向登青雲而來者也彼其遭際熙洽之盛履歷

康莊之途篤慎勤端操行俾英聲煥譽稱道在人而雲  
山舊隱光價增重其志固可嘉其宦轍方亨而未艾茲  
以疾歸抑豈其所得已也哉學初春秋方五十齒髮未  
衰落山房之卧豈宜與隱者同一怡悅哉釋煩劇就暇  
豫尚精藥石慎節宣俾將來復于康和而出躋遠大山  
中白雲將不得於學初而久留也學初姑行哉予為之  
記盖尚有望於異日焉

王峽書房記

新淦之上游八十里其西瀝曰峽江盖江之兩旁皆山  
重巒疊嶂蒼翠之色郁然如削碧玉而江之流實經乎  
其中王峽之得名以此曾氏宗沂永豐之望族嘗贅峽  
江李氏因遂僑居焉今宗沂既捐館舍其子景武嘗慨  
然自念其先世為詩書簪紱之胄茲雖托寓於斯抑其  
可遂忘其故業乎廼於所居之旁別築一室以為藏修  
之所而名之曰王峽書房取經史百氏置其中日諷誦  
其言而探索其義孜孜焉弗敢少懈客至或焚香鼓琴

或汲泉煮茗或分題賦詩或引觴命酌凡翰墨玩好之  
適衣冠游宴之娛無往而不自得心甚樂焉間來京謁  
予翰林請言以記之夫世家子弟生長華腴往往侈於  
膏粱紈綺之習以馳騫於聲利之塗其不視禮義為虛  
文目詩書為常物者鮮矣景武承積善之餘慶襲閥閱  
之遠緒乃能屏斥紛華耽嗜簡冊以涵泳聖賢之遺訓  
景仰前哲之高風勉勉循循以求其至此非其才識之  
超邁者能之乎其與世之追逐時好宴安逸樂以流連

於光景而漠然無意於問學者奚啻霄壤哉於是景武之賢於人遠矣景武之叔父子啓今為翰林侍讀學士與予有同寅之好因其請遂特為之記焉

蘭室記

鴻臚寺丞鳳陽周君文衡清修剛直之士也嘗於居室之前除地半畝屏去纖穠艷麗之植惟時蘭數本於其間綠葉紫莖青青楚楚幽映窓戶間於是扁其兩楹之中曰蘭室復得元趙文敏公所寫蘭石圖裝潢成卷請

予記之將以刻於其室予惟水陸花卉之產千品萬彙  
其有足以資人之玩好者亦豈以其容色臭味而然哉  
苟以容色臭味為美而篤意好之此衆人之物於物者  
之所為也夫何足取哉故陶淵明之於菊周茂叔之於  
蓮林君復之於梅其冥契妙悟超然獨得盖有出於容  
色臭味之外者故其人與物並傳於天地間以至于今  
弗衰然則文衡蒔蘭於室抑豈徒為玩好哉想夫春雨  
新霽光風微動異香芬馥浮動几席間方其時退食自

公凝然獨處操之於琴則曰此吾夫子之遺音也紉之為佩則曰此楚大夫之憂思也於是千載而下而聖人之道德未遠賢者之忠貞弗忘則于觀物之頃把翫之餘烏得不有以冥契妙悟而思所以希聖希賢者乎矧文衡以儒發身遭際聖明由名進士給事內廷出倅大州擢選部員外郎陞福建布政司參議繼改今官數歷中外垂三十年而修名嫋節暢達遐邇則其平日有得於觀物之趣也豈不深哉夫不泥聖賢之迹而能師聖

賢之心於容色臭味之間而有超然獨得之妙視世之物於物者奚翅霄壤哉如是而與陶之菊周之蓮林之梅以並聞於時可也若夫觀其秀茁如子弟之在庭挹其芬芳若良朋之同室是皆其餘事耳予與文衡同年相知為最舊故於其請也樂為之記焉

### 川石記

距建安邑城之東有地曰川石其土壤夷曠介乎古田甌寧政和二邑之交山明而水清地幽而境勝其居於

此者多豐家巨族有溪焉其灘之名曰書筒崖石壁立  
高出霄漢舊有石高僅三尋其廣四尋有咫形如書筒  
屹然溪上其後淪沒水濱世傳唐羅隱過之里人不為  
禮隱因指此石曰書筒落水川石無官以故民之居其  
間家雖殷阜子弟聰敏咸感其言不令讀書由是累世  
無仕者國朝洪武中里之著姓陳氏伯進有志之士也  
嘗謂其子懷慎曰諸孫宜擇其資稟秀異者為學諸生  
以取進仕懷慎舉隱言以對伯進笑曰易云積善之家

此也國朝洪武中主僧無涯森公欲拓其舊基大建殿  
宇而難其材時吾大父達卿公山有大木數萬株嘗戒  
子孫不以貨鬻唯求為學舍寺觀杠梁棺槨者與之於  
是森公袖疏來扣時予大父已歿祖妣阮氏即諭諸子  
紹先志隨其所欲悉資給之并施以齋糧工力無一毫  
靳吝之色森公遂得撤其卑陋恢廓故址首建大殿次  
為山門廊廡暨觀音殿伽藍開山二堂裝塑佛像辛酉  
復建大毘盧閣高八十餘尺閣之後為寢堂堂之東南

為方丈以至僧舍庖湍衆屋皆具備極完好于時又得都指揮使施公某千戶方某率鄉之善信施財力以協相之於是寺宇壯麗縑流益增辛未詔清理佛教遂併為叢林以改今額鄉郡稱雄刹焉自是又三十年為永樂壬寅寺僧普通以齋事至北京廼以寺之本未來請予記予惟真如寺宇實吾家施材所建幼時往來其中見其高甍鉅棟未嘗不仰而望之以懷大父之德今大父窀穸復託寺近春雨霜露不能不興吾追遠之念則

某之請又烏可辭耶嗟夫佛氏之教無非使人避禍趨福而皆思有以為善也故世之崇信尊奉之者雖傾貲竭力無所愛惜焉今真如為建大利由大父樂施之德以首倡之而四方好善之流亦皆翕然相繼為之相焉此雖佛氏之所以能人流嚮如此而森公之流亦豈非能卓然自立而興起其教者歟不然何其若是之盛也因其請故樂為記之蓋不惟有以知佛氏之為盛其徒之能立抑且有以誌先大父之遺德焉

文敏集卷十